

TEZAU LITURGIC
21 IANUARIE
RUGĂCIUNEA SF. CUVIOS
MAXIM GRECUL DE LA RADONEJ

О, премудрости сокровищнице, всякаго ведения и разумения исполненная, Духа Святаго немолчный органе, труба Божественная, возвещающая нам веления Закона Божия, отче преславне Максиме! Се ныне мы припадаем ти, отче блаженне, и вопием усердно: просвети омраченные умы наша, неведущия велений Божиих, и направи души наша во еже делати заповеди Господни прилежно и в словесех Божиих поучатися день и ночь. Огради уста наша от глаголов суетных, речений лукавых и многоглаголения суетного, имже мы прилепихомся паче неже словесем оправданий Божиих и возлюбихом их превыше звяцания псалтири и гуслей Давидовых. Укрепил языки наша, во еже источати им глаголы спасения, песни молитвенныя и словеса псаломская, имиже подобает Господа воспевати и превозносити Его дондеже есмы. Ты, отче преподобне, и в темности узилица, мучимь неправедно от приставник немилостивых, во свете повелений Господних пребываше и

светлостѣми Егѡ исполняше ум свой и помышленіе свое. Мы же, ленивии и нетерпеливии, свет солнечный на всяк день зряще и глаголы Святаго Писания во ушесех своих имуще, ни о внимании глаголам евангельским, ниже о научении в наставлениях отеческих попечения возымехом. Призри на ны, алчущия пищи духовныя, обаче не приступающия к трапезе Премудрости Божия; даждь нам растворенное в чаше Ея вино и хлеб, сходяй от рук Божиих с Небес, да и мы исполнимся ведения заповедей Господних и разумения, что есть право следовати стопам Божиим; испроси нам благословение Господне, научающее оправданием Егѡ, и приведи ны с собою пред Лице Божие, Емуже ты предстоял еси присно, якоже и прежде просиявшии святии мужи и жены, да тобою вразумлении и наставлении, пути своя исправивше, удостоимся внити в безконечную светлость Небеснаго Царствия, идеже купно с лики святых и сонмы Безплотных сподобимся присно воспевати Отца, Сына и Пресвятаго Утешителя Духа, Троицу Единосущную и Нераздельную, во веки веков. Аминь.

Текст молитвы преподобному Максиму Греку утвержден к общецерковному богослужебному употреблению решением Священного Синода от 17 июня 2021 года (журнал № 34).